

武林掌故叢編

大昭慶律寺志卷之七

軌儀

法經可循謂之軌辦作有度謂之儀先佛世尊作之於前學佛弟子由之於後非軌儀則學處無序無程叢林聚衆之所主者將何紀綱依止者將何趨捨此每處伽藍所以各有規則也今昭慶衍華山宗派凡有軌則悉遵隆昌彼之規矩法度備載華山寺志不煩紀述惟此放戒持律軌儀先佛定制未可漏略陳於左方表其法門所獨著也

戒軌儀 自宋至明昭慶每歲三月三日放戒今則

因是萬壽戒壇三月十八日恭逢

聖祖仁皇帝降生聖節定於是日首放戒

游覽志云每歲三月三日海內縉流雲集於昭慶
寺推其長老能通五宗諸典者登壇說法敷陳具
戒其徒跪而聽之名曰受戒至今行之

發心受戒者先期赴寺

戒壇圖經云欲受戒者先於有智人所策發教於
萬境之上起慈護心毗婆沙論云由普於一切有
情上起善意樂無損害心得戒若臨集僧當行法
事但當發上品心得上品戒者沙彌未曾聞不知

何謂此猶空雷發奇峰之天甘雨絕流金之地爾
上品心者卽是於萬境上起慈護也

釋如蘭送昇上人游浙受戒昭慶序 出世之士
欲廣其道者必四方參訪以會通其旨庶不滯於
一隅所以觀覽山川以擴其心目交接文物以充
其學問游焉息焉皆有以裕乎中而應乎外者猶
器窪而後可以受鼓鐙而後考則鳴也武昌昇上
人少有四方之志浮西江觀勝於上都嘗歷清要
於天界禪林其心未以爲足又將抵錢唐受具戒
於西湖昭慶寺渡江而東禮阿育王之塔以瞻舍

利登補陀之巖以覲大士觀感之際必將有所得焉一日過長干求序以白其志夫戒爲三學之初門定慧由是發生未有不受戒而得成正覺者吾佛舍利徧乎寰宇靈光昭著唯鄮峰爲最是不可不一睹也觀音氏以如幻三昧普應羣機赫然震耀於海岸孤絕之處是不可不一往也一舉而得三勝事豈不慊其平生素願哉雖然人固有務外博而不內觀者世俗之通病也上人能以知養恬以人合天則接容而悟物目擊而道存者其在茲焉

釋方澤送南詢之昭慶受具詩 入如入律不多
事鵠舉鸞飛在此行西子湖頭春更別桺枝搖曳
杏花明 又送施居士受戒昭慶詩 龍象踰踰
寶座來年年湖上戒壇開道人還上天池躍莫被
波離點額回

至則登名字於籍名曰行童

釋成覺行童籍序云昭慶以律宗創戒壇哀然爲
海內稱首獨行童一事正君子所謂始進者乃漫
不加察始之不慎貽悔於終有識者病其法之不
立也舊法藁書行童一冊有去而名畱有亡而名

存有旁注塗抹等弊有增報改名等僞朔望祝延之時攙越前後上下攘臂爭位殆非所以尊朝廷整律儀也萬厯丙戌住持仰山端公碧溪心公當其寺任不能無憂之慨然曰行童者出世始進之名也始進於正猶難保其後况以不正進乎且今日之行童他口之住持也亦宗師也正其名序其次夫豈小故哉於是命工刊其都圖籍貫年月名字去亡則削之不能施其旁注塗抹之私示人以此皆知皆聞不敢改名增報真者顯露而奸僞銷然後上下前後適居於應住之序而爭端絕矣覺子

曰是法也倡之自一時雖百世行之可也可爲後來放戒法喜而爲之序

先期主壇宗師推擇高行僧爲羯磨師教授師選其熟於軌儀者爲引禮師

行童進堂日誦持毘尼日用等法典引禮教之誦者恐有音讀違誤句讀不明必詣教授師處親聆誦經一過謂之過經日持四威儀法亦引禮教之而大成就於教授凡將受戒先謁羯磨寮問難審其從前罪犯應得若何懺摩遂如教奉行懺悔滅罪法及說戒日堂設三座中宗師左羯磨右教授

引禮旁列糾儀比丘菩薩戒則異是 梵言懺摩
此言悔過發露過咎厭悔捨離也遮難者十三重
難十六輕遮

沙彌戒在殿說十種戒

十戒詳見前卷

比丘戒據壇正位白

四羯磨說具足戒

具足戒詳見前卷

具三師七尊證是名十

師

梵語羯磨此言作法一切羯磨須具四法一法二
事三人四界第一法者羯磨三種一心念法發心
念境口自傳情非謂不言而辨前事二對首法謂
各共面對同秉法也三衆法四人以上秉於羯磨

以三羯磨通前單白故云白四三師者本師和尚
羯磨教授也七尊證者阿闍黎七座爲證明師

凡欲受菩薩大戒者先發大願燃頂以誓然後受戒
梵網經云新學菩薩有從百里千里來求大乘經
律應如法爲說一切苦行若燒身燒臂燒指若不
燒身燒臂燒指供養諸佛非出家菩薩案慈恩然
頂誓行四禪三昧遵承是法今爲定制

定於四月初八日世尊降生辰於殿廡說菩薩戒宣

十重四十八輕垢罪

十重四十八輕
垢罪詳見前卷

菩薩戒唯佛足當本師和尚文殊師利菩薩爲羯

磨彌勒菩薩爲教授十方諸佛爲尊證十方菩薩
爲同學故主戒宗師側坐代佛說戒二師旁立
期畢給訓嚴持列其名氏曰同戒錄

宜潔宗師同戒錄序云夫戒法而言同者有理有
事何謂理如經云奇哉一切衆生具有如來智慧
德相但以妄想執著而不證得又經云光非青黃
赤白非色非心非因果法所謂諸佛已悟衆生尙
迷者是也何謂事如律云必須十師數滿白四羯
磨成就方能感發戒體攝入僧論是以和尚稱爲
得戒本師謂能生諸子之戒身也其餘諸師各有

輔佐成戒之功羯磨浣滌追器教授教誡威儀尊
證證明受授引禮親授演習乃得戒之增上緣皆
屬事相苟外緣弗具則內困難達今汝等發上品
心獲上品戒皆由諸師成就理宜遵奉佛制識取
諸師相貌名號或終身承事供養或五夏依學毘
尼適恐他緣師資各異凡遇節臘佛事之期必須
憶容焚香遙爲敬禮以志不忘臨壇秉具之初心
孝名爲戒之聖典也律云白四羯磨受戒竟和尚
當語年月日時以便好分上中下座今受戒諸子
理雖本具事戒新得因各給同戒錄一冊以記諸

師及得戒之先後庶布薩自恣三無紊亂承迎禮拜次第秩然不負如來諄切之誠所冀謹護今日新得之戒身以復其心佛衆生同具之理也諸子勉旃

尤侗戒錄題辭云昭慶寺戒壇余旣爲之記矣於今延請華山宜潔律師登壇說戒期終給訓嚴持列其名氏曰同戒錄余覽而美之蓋師親承南山一宗總持三學翹勤四分於止作二持率由見公教教毘尼者所希有也吾觀大衆株杌幾入般舟三昧當安居自恣布薩羯磨至於晨鐘暮鼓梵唄

渤海持鉢著衣威儀秩秩程子三代禮樂之歎豈
有異哉師若曰凡我同戒之人旣受之後言歸於
律由此爲沙彌爲比丘爲菩薩人皆可以作佛矣
後之覽是錄者猶如靈山一會儼然未散時也

辭去日給戒牒

護戒牒文 敕建大昭慶律寺護國萬壽戒壇

欽承歷朝聖旨按唐麟德二年詔終南山道宣律
師於淨業寺建石戒壇受具足戒又寶歷元年敕
兩街建方等戒壇擇戒行者爲大德又大中二年
敕上都東都荆揚汴益等州建六等戒壇爲僧尼

傳受戒法宋祥符二年詔京師太平興國寺立奉
先甘露戒壇又慶厯二年詔允堪律師於杭州大
昭慶寺建壇開戒天下諸路皆立戒壇凡七十二
所京師慈孝寺別立大乘戒壇明洪武十年禮部
尙書張呂本等奉聖旨天下各寺院僧人行童願
要遊方參學共相講明經義傳誦戒律所遇官司
毋得禁他又永樂五年諭行腳僧人受戒依善知
識住處結壇說戒講演經典若遇關津把隘官員
人等不許阻當任地集衆教化善法如朕親臨教
訓圓明無如佛上法寶永爲定例又萬厯四十一

年御馬監太監張然傳奉聖旨詔大沙門如馨律
師欽賜紫衣鉢孟錫杖於四十二年四月初一日
至初八日恭就五臺山敕建聖光永明禪寺傳受
千佛大戒又明末甲申年敕大沙門寂光於南京
大報恩寺演教傳戒至

大清啓運於順治十七年

世祖皇帝遣內使敕降禮部製受戒牒受戒僧人凡傳持

戒律原期廣布佛法佐助太平爾旣習戒律聽教
參禪或在寺院或在山林須講明經義精嚴戒律
俾釋教修明僧規整飭等因在部欽此欽遵今於

浙江省大昭慶寺萬壽戒壇依律開演戒法內有
某甲籍貫依某出家於某年某月某日受某戒宏傳
戒法用報

國恩爲此具牒各給一道隨身收執游方參學凡遇
關津把隘處執此驗實須至戒牒者

南山教主第一代澄照道宣律師 昭慶建壇真

悟允堪律師 資持記主大智元照律師 中興

昭慶第一代宜潔書玉律師 本壇嗣法傳戒和

尙某 羯磨阿闍黎某 教授阿闍黎某 尊證

阿闍黎某某 年月日給 右牒給付某戒弟子